



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Parlamentu Nasionál
13 Abril 2021

Komisaun A Parlamentu Nasionál rona JSMP nia hanoin kona-ba esbosu Lei Organizasaun Judisiáriu

Komisaun A Parlamentu Nasionál (PN), iha 08 Abril 2021, hala'ó audénsia públika ho JSMP no Prezidente Tribunál Rekursu (PTR). Objetivu mak atu rona hanoin husi parte relevante sira nian, partikularmente JSMP kona-ba Projetu alterasaun Lei Nú 19/V (3^a) kona-ba Organizasaun Judisiária no Proposta alterasaun Lei Nú. 28/V(3^a) kona-ba Organizasaun no Funsionamentu Tribunál nian.

Iha introdusaun ba materia, Prezidente Komisaun A, distintu deputadu Sr. Joaquim dos Santos “ Boroluli” haktuir katak inisiativa hamosu projetu no proposta lei ne'e tanba atu introdús sistema judisiáriu foun ne'ebé harii no hahú nia knaar hodi responde ba mandatáriu Konstituisaun nian ne'ebé hatur ona iha Artigu 163 número 2 kona-ba Organizasaun Judisiáriu ne'ebé iha Timór-Leste laran bainhira Lei-Inan ne'e tama iha vigór sei la'ó nafatin to'ó bainhira sistema judisiáriu foun harii no hahú nia knaar.

“JSMP apresisa tebes ba serbisu no esforsu Parlamentu Nasionál nian partikularmente ba Komisaun A no Governu ne'ebé tau ona prioridade hodi inisia proposta no projetu lei rua ne'e hodi aselera ona diskusaun ba lei refere. Ida ne'e, nu'udar pasu ida pozitivu ba Timor-Leste atu bele iha rasik nia lei ne'ebé sei regula funsionamentu sistema judisiáriu”, dehan Diretora Ezekutiva JSMP, Ana Paula Marçal.

Durante ne'e funsionamentu tribunál sira iha Timor-Leste bazeia de'it ba iha Regulamentu UNTAET Nú.11/2000, de 6 de Marsu ne'ebé alteradu ho Regulamentu Nú.25/2001 hodi introdús kona-ba organizasaun judisiáriu iha Timor-Leste kona-ba fahe tribunál sira ba distritu 4 mak hanesan Tribunal Distritál Baukau, Dili, Oekusi-Ambeno no Suai. Alende ne'e, inklui mós diploma no norma sira ne'ebé regula kona-ba estatutu profisionál sira setór judisiáriu nian, partikularmente, majistradu juis, majistradu Ministériu Públiku, ajente Defensoria Públika, Advogadu Privadu no mós buat esensial sira seluk ne'ebé bele fó suporta ba funsionamentu administrasaun justisa nian iha Timor-Leste.

JSMP hanoin katak importante tebes lezislador sira atu rona hanoin sira husi entidade relevante sira atu fó sira nia apresiasaun kle'an ba esbosu lei rua ne'e hodi nune'e

bele hamosu hanoin ida ne'ebé refletivu ba hadi'ak liutan lei ne'e hodi bele responde no refléta duni situasaun real ne'ebé autór judisiáriu sira enfrenta no nesesita.

Iha apresentasaun, JSMP introdús kona-ba importante husi lei ne'e mak oinsá mak bele harii metin ai-rin tolu ne'ebé iha setór judisiáriu ne'ebé iha nia serbisu iha nia interdependénsia ba malu tantu Tribunál, Ministériu Públiku no Defensoria Pública ho Advogadu Privadu, tanba se laiha ida mak prosesu justisa sei la la'o ka funciona.

Alende ne'e, JSMP mós subliña atu hadi'a fali título lei, estruturasaun no sistematizasaun lei hodi bele sai organizadu, estruturadu no sistematizadu liu tan. Nune'e, JSMP iha nia paraser eskrita, apresenta mós estrutura alternativu ida. Atu hatene kona-ba estrutura alternativu ne'ebé JSMP rekomenda bele asesu paraser JSMP iha *website* JSMP nian¹.

Partisipa iha audénsia ne'e mós Meritísimu Juis Dr. Deolindo dos Santos, Prezidente Tribunál Rekursu ne'ebé iha nia intervensaun subliña mós artigu sira ne'ebé regula kona-ba Ministériu Públiku no Defensór Públiku, ofisiál justisa inklui apoiu paralelu ba administrasaun iha tribunál sira atu regula de'it iha sira nia Estatutu.

Entretantu iha enseramentu, Prezidente Komisaun A, deputadu Sr. Joaquim dos Santos agradese ba partisipasaun JSMP no Tribunál iha audénsia ne'e no agradese mós tanba iha audénsia ne'e Komisaun A hetan kedas paraser husi JSMP no Tribunál ne'ebé disponível kedas atu bele inklui iha relatóriu Komisaun nian iha futuru.

Atu hetan infomasaun kompletu bele kontaktu :

Ana Paula Marçal
Diretora Ezekutiva JSMP
Email: ana@jsmp.tl
Telefone: 77040735
Website: <https://jsmp.tl/>

¹ Bele asesu iha ne'e: <https://jsmp.tl/publications/submisaun/>